

宣城詩集五卷

宋本影寫



謝宣城詩集目錄

齊尚書吏部郎陳郡謝

眺元暉

東山氏圖書

南齊謝宣城詩集目錄

卷第一

賦九首

酬德賦 并序

思歸賦 并序

七夕賦

高松賦

杜若賦

野鷺賦 并序

謝集目錄

遊後園賦

臨楚江賦

擬宋玉風賦

雩祭歌八首

迎神歌 三言
八章

世祖武皇帝歌 四言
三章

青帝歌 三言
三章

赤帝歌 七言
三章

黃帝歌 五言
三章

白帝歌 九言
三章

黑帝歌

六言
三章

送神歌

三言
五章

四言詩三首

侍宴華光殿曲水奉敕爲皇太子作

九章

三日侍宴華光殿曲水宴代人應詔

十章

三日侍宴曲水代人應詔

九章

卷第二

樂府四十三首

元會曲

郊祀曲

謝集目錄

二

鈞天曲

入朝曲

出藩曲

校獵曲

從戎曲

送遠曲

登山曲

泛水曲

同賦鼓吹曲名以先成爲次五首

同前再賦六首

同賦雜曲名五首

永明樂十首

三階怨一首

金谷聚一首

王孫遊一首

銅爵悲一首

江上曲一首

曲池之水一首

同謝諮議詠銅爵臺一首

卷第三

謝集目錄

三

詩四十三首

將發石頭上烽火樓一首

荅王世子一首

荅張齊興一首

酬王晉安一首

暫使下都夜發新林至京邑贈西府同

僚一首

始出尚書省

直中書省

觀朝雨一首

新亭渚別范零陵雲一首

之宣城郡出新林浦向版橋一首

始之宣城郡一首

宣城郡內登望一首

冬日晚郡事隙一首

後齋迴望一首

落日惆悵一首

望三湖一首

遊山一首

賽敬亭山廟喜雨一首

謝集目錄

四

祀敬亭山一首

遊敬亭山一首

賦貧民田一首

與江水曹至濱干戲一首

送江水曹還遠館一首

送江兵曹檀主簿朱孝廉還上國

臨溪送別一首

將遊湘水尋句溪一首

忝役湘州與宣城吏民別一首

休沐重還丹陽道中一首

移疾還園示親屬一首

出下館一首

遊東田一首

秋夜解講一首

秋夜一首

春思一首

治宅一首

冬緒羈懷示蕭諮議虞田曹劉江二常
侍一首

懷故人一首

謝集目錄

五

夜聽妓二首

京路夜發一首

晚登三山還望京邑一首

高齋視事一首

郡內高齋閑坐答呂法曹一首

卷第四

詩四十六首

直石頭一首 梁武帝附

和蕭中庶直石頭一首

經劉瓛墓下 隨郡王蕭子隆附

登山望雷居士精廬同沈左衛過劉先

生墓下作并序竟陵王蕭子良附

奉和虞炎

奉和柳惲

奉和沈約

奉和眺

離夜一首

同前江丞附

同前王常侍附

餞謝文學一首沈約附

謝集目錄

六

同前虞炎附

同前范雲附

同前王融附

同前蕭琛附

同前劉繪附

和別沈右率諸君一首

卧疾叙意王秀之附

和王長史卧病一首

行園沈約附

和沈祭酒行園一首

北戍琅邪城

江丞附

和江丞北戍一首

昧且出新亭渚

徐勉附

和徐都曹出新亭渚

入琵琶峽望積布磯

劉繪附

和劉繪入琵琶峽望積布磯一首

在郡卧病呈沈尚書一首

荅謝宣城一首

沈約附

和何儀曹郊遊二首

和劉西曹望海臺一首

謝集目錄

七

和中丞聞琴一首

和伏武昌登孫權故城一首

夏始和劉孱陵一首

和宋記室省中一首

和王著作八公山一首

和王主簿李哲怨情一首

贈王主簿二首

同王主簿有所思一首

落日同儀曹照一首

和紀叅軍服散得益一首

新治北窻和何從事一首

同羈夜集一首

卷第五

詩四十首

和隨王雜詩一十六首

詠春風一首

詠竹一首

詠薔薇一首

詠蒲一首

詠兔絲一首

謝集目錄

八

詠落梅一首

詠東堂桐一首

詠梔子一首

同詠樂器三首

同詠坐上器玩二首

同詠所見一物十一首

聯句七首

阻雪一首

還途臨渚一首

紀功曹中園一首

閑坐一首

侍筵西堂落日望鄉一首

祀敬亭山春雨一首

往敬亭路中一首





謝宣城詩集卷第一



賦

酬德賦 并序



右衛沈侯以冠世偉才眷予以國士以建武二
 年予將南牧見贈五言予時病既以不堪涖職
 又不獲復詩四年予忝役朱方又致一首迫東
 偏寇亂良無暇日其夏還京師且事讌言未遑
 篇章之思沈侯之麗藻天逸固難以報章且欲
 申之賦頌得其盡體物之旨詩不云乎無言不
 酬無德不報言既未敢為酬然所報者寡於德

謝集一

一

耳故稱之酬德賦其辭曰

悲夫四游之代序六龍驚而不息輕蓋靡於駸
 奔玉衡勞於拊翼嗟歲晏之勤歡曾陰默以棲
 側玄武伏於重介宛虹潛以自匿覽其物之用
 捨相群方之動植吊悴軀於華省理衣簪而自
 敕思披文而信道散奮蕙於胷臆嗟民生之知
 用知莫深於知已彼知已之為深信懷之其何
 已牽弱葛之蔓延寄陵風於松杞指曲蓬之直
 達固有憑於原臬彼排虛與躡實又相鳴於林
 沚興伐木於友生詠承筐於君子矧景行之在

斯方寄言於同耻求相仁於積習寓神心於名
理惟敦牂之旅歲實與齊之二六奉武運之方
昌覩休風之未淑龍樓儼而洞開梁邱煥其重
複君奉筆於帝儲我曳裾於皇穆藉風雲之化
景申遊好於蘭菊結德言而爲佩帶芳猷而爲
服援雅範以自綏懿前修之所昔仲宣之發
穎實中郎之倒屣及士衡之籍甚託壯武之高
義有杞梓之貞心協丹采之輝被伊吾人之陋
薄雖黼藻之何寘惟風雅之未變知雲網之不
廓譬曾棟之將傾必華榱之先落翳明離以上

賓屬傳體於織萼周二輝而分崩擠九鼎於重
壑雖魚鳥之欲安駭風川而迴薄微天道之布
新嗟負首其焉託余窘迹以多愧塊離尤而獨
處君紆組於名邦貽話言於川渚悵分手於東
津望徂舟而延佇慮古今之爲隔豈山川之云
阻賴先德之龍興奉英靈之電舉事紫泥之密
勿腰青縞而容與沾後惠以竭來竟卒獲其笑
語我艤舟以命徒將汨徂於南夏旣勗予以炯
戒又引之以風雅若笙簧之在聽雖舒憂而可
假昔疢病於漳濱思繼歌而莫寫恩靈降之未

已奉京粉而作傳臨邦塗之永陌懷余馬於騏
馬望平津而出宿登崇岡而興賦顧歸憶之南
迴引行鑣而東驅何瓌才之博侈申贈辭於萱
樹指代匠而切偲比治素而引喻方含毫而報
章迫紛埃之東驚釋末位以言歸忽乘駟以南
赴連篇章之莫訓欲寄言於往句類鍛翻之難
矯似洞源之不注意搔搔以杼柚魂營營而馳
驚爾腰戟於戎禁我拂劔於郎闈願同車以日
夜城望昏而掩扉時遊盤以未極睠落景之徂
輝若清顏之倏忽吝懽賞之多違排重關而休
告知南館之有依驂職門以右轉僕望路其如
歸志清漏之不緩惜曉露之方晞聞夫君之東
守地隱蓄而懷仙登金華之問道得石室之名
篇悟寰中之迫脅欲輕舉而捨旃離寵辱於毀
譽去天伐於腥羶忽携手以上征躋中皇之脩
迥巾帝車之廣軾棹河舟之輕艇歷星街之熠
耀浮天潢之澗溟機九轉於玉漿練七明於神
鼎吹萬化而不喧度千春之可並齊天地於條
忽安事人間之紆倖哉

夫鑒之積也無厚而納窮神之照心之徑也有
域而懷重淵之深余少而薄遊身 防方思

俄然萬里晚自

省諒非一塗何則

此後闕

余菲薄以固陋受恩靈而不訾施鍾黃之沃若
剖金符之陸離舟未濟而河廣塗方遙而馬疲
忽中寢而念厲魂申旦而九移昔受教於君子
逢知己之隆眄被名立之羽儀沾宦成之藻綯
羌服義而不怠豈臨歧而喻變勢方迅於轉圓
理好旋於奔電援弱葛而能升踐重岡而不眩
信提福之非己寧悔禍其如見大明廓以高臨

謝集一

四

吹萬欣而同悅跨神臯之沃衍奉英藩之睿哲
承比屋之隆化踵芳塵之餘烈懷齷齪之褊心
無夸毗之誕節竟伊鬱而不怡賴遐討於先哲
紛吾生之遊蕩彌一紀而歷茲自下車於江海
涉青春於是時睠崇芒而引領望大夏而長思
雖曲街之委陋猶寤寐而見之况神交而通夢
眇河漢於佳期尔乃眷言薄暮南眺悠然將整
歸轡願受一廛考華城之直陌相洛浦之迴阡
連飛甍於故友接閑館以懷仙臨南場以藝藿
寄北池而採蓮睇微莖之霍霍望水葉之田田

乃翦山木不日爲功非輪非奩去斲去確夜索
綯而繞繞旦乘屋而芄芄竹櫺躋區而經北繩
閉窈窕以臨東布茵蕭於踈棹織熒亂於迴攏
於是籬插芳槿門拂長楊園桃春發牕竹夏涼
晨露晞而草馥微風起而樹香無芬菲以襲予
空倚旋於都房恒離居以歲月庸銷落而徒傷
我聞時命有殖無遷徵事或在求理未甄譬豐
草之區別隨霜露而天延背萱鮮於堂北尚幽
幽而未捐苟外物以能惑亦在應而無騫况朝
霞之彩可嚙瓊扉之飾方宣養以虛白之氣悟
以無生之篇豈加璧之贈可動執珪之位能纏
歸來薄暮聊以永年

七夕賦

奉護軍
王命作

金祇司矩火曜方流素鍾登御夷律鳴秋朱光
既夕涼雲始浮盈多露之藹藹升明月之悠悠
步廣階而延膝屬天媛之淹留嗟斯靈之淑景
招好仇於服箱邁姮娥而擢質凌瑤華而擅芳
厭白玉以爲飾霏丹霞而爲裳迴龍駕之容裔
亂鳳管之淒鏘騰燭光於西極命二妃於瀟湘
軾帝車而捐玦凌天津而上翔悵漢渚之夕漲

欣河廣之既梁臨瑤席而宴語綿含睇而娥揚
嗟蘭夜之難求泣會促而怨長忌織阿之方駕
客長庚之末光撫鳴琴而脩况浩安歌而自傷
歌曰

清絃愴兮桂觴酬雲幄靜兮香風浮龍鑣蹠兮
玉鸞整睠星河兮不可留分雙袂之一斷何四
氣之可周斯乃嚮像恍惚髣髴幽曖耳之無聞
目之無績故鍾鼓聞而延子隱白日沈而季后
對豈形器之所求亦理將其如昧君王壯思風
飛冲情雲上顧楚詩而縱轡瞻蘭書而競爽實
研精之多暇聊餘日之駘蕩賦幽靈以去惑排
視聽而玄往晒陽雲於荆夢賦洛篇於陳想乃
澄心而閑邪庶綢繆於茲賞

高松賦

奉司徒竟陵王教作

閱品物於幽記訪叢育於秘經巡汜林之珍望
識斯松之最靈提於巖以群茂臨於水而宗生
豈榆柳之比性指冥椿而等齡若夫脩幹垂陰
喬柯飛穎望肅肅而既閑即微微而方靜懷風
音而送聲當月露而留影既芊眠於廣隰亦迢
遰於孤嶺集九仙之羽儀棲五鳳之光景固松

木之爲選貫山川而自求尔乃青春受謝雲物
含明江臯綠草曖然已平紛弱葉而凝照競新
藻而抽英陵翠山而如剪施懸蘿而共輕至於
星回窮紀沙鴈相飛同雲映其無色陽光沉而
減暉卷風颯之吸歛積霰雪之嚴霏豈凋貞於
歲暮不受令於霜威若乃體同器制質兼上才
夏書稱其岱畎周篇詠其徂徠乃屈已以弘用
構大壯於雲臺幸爲翫於君子留神心而顧懷
君王乃徙讌蘭室解佩明椒搴幽蘭於夕陰詠
聳幹於琴朝陵高丘以致思御風景而逍遙夷
黻冕之隆貴懷汾陽之寂寥邈道勝於千祀蘊
神理而自超夫江海之爲大實洎澮之所歸瞻
衡恒之峻極不讓壤於塵微嗟孤陋之無取幸
聞道於清徽理弱羽於九萬愧不能兮奮飛

杜若賦

奉隨王教作時年
二十六於坐獻

憑瑤圃而宣游臨水木而延佇柳含色於遠岸
泉鏡流於枉渚蔭綠竹以淹留藉幽蘭而容與
覽茲榮之悅茂紛爲芳於清籟觀夫結根擢色
發曜垂英緣春巒以纖布蔭涼潭而影清景奕
奕以四照枝靡靡而葉傾冒霜蹊以獨蒨當春

郊而逕平蹇汀洲以企予懷石泉於幽情嗟中
巖之織草廁金芝於芳叢夕舒榮於溽露旦發
彩於春風承羲陽之光景庶無悲於轉蓬

野鷺賦 并序

有門人斃一野鷺因以爲獻余時命以登俎用
待賓客客有愛其羽毛請余爲賦其詞曰

夫何羅人之伎巧薦江海之逸禽落摩天之迅
羽絕歸飛之好音碎文錦之丹臆裂雕綺之翠
衿孤雛驚以靡翼羈雌叫而莫尋越滄流以遠
致乃交賀以兼金因閤寺以傳請排邃戶以重
深貴敷社以取愛願登俎以甘心

謝集一

八

遊後園賦

奉隨王
教作

積芳兮選木幽蘭兮翠竹上蕪蕪以蔭景下田
田兮被谷左蕙畹兮彌望右芝原兮寫目山霞
起而削成水積明以經復於是敞風閨之藹藹
聳雲館之苕苕周步欄以升降對玉堂之沈寥
追夏德之方暮望秋清之始颯藉宴私而遊衍
時晤語而逍遙尔乃日栖榆柳霞照夕陽孤蟬
以散去鳥成行惠氣湛兮惟殿肅清陰起兮池
館涼陳象設兮以玉瑱粉蘭藉兮咀桂漿仰微

塵兮美無度奉英軌兮式如璋藉高文兮清談
預含毫兮握芳則觀海兮爲富乃游聖兮知方

臨楚江賦

爰自山南薄暮江潭滔滔積水裊裊霜嵐憂與
憂兮竟無際客之行兮歲已嚴尔乃雲沈四岫
風蕩中川馳波鬱素駭浪浮天明沙宿莽石路
相懸於是霧隱行鴈霜眇虛林迢迢落景萬里
生陰冽攢笳兮極浦弭蘭鷁兮江潯奉玉罇之
未暮冷 勝之芳音願 光兮秋月庶求照於
遺簪

謝集一

九

擬宋玉風賦

奉司徒
教作

起日域而搖落集桂宮而送清開翠帳之影藹
響行珮之輕鳴揚淮南之妙舞發齊后之妍聲
下鴻池而蓮散上雀臺而雲生至於新虹明歲
高月照秋晬儀廼豫冲想雲浮鄒馬之賓咸至
申穆之醴已酬朝役登樓之詠夕引小山之謳
馱朱邱之沉邃思輕舉而遠游驪驪之馬魚躍
飄鑿車而水流此乃宋玉之盛風也夫子雲寂
寘叔夜高張煙霞潤色荃萸結芳出澗幽而泉
列入山戶而松涼眇神王於丘壑獨超遠於孤

觴斯則幽人之風也

雩祭歌

建武二年
明堂辭

清明暢禮樂新候龍景選貞辰
陽律亢陰晷伏耕下土荐種稌
宸儀警王度宣瞻雲漢望旻天
張盛樂奏雲僊集五精延帝祖
雩有諷縈有秩秬鬯芬圭瓚苾
靈之來帝閭開車煜燿吹徘徊
停龍轡徧觀此凍雨飛祥雲靡
壇可臨莫可歆對吐社鑒皇心

謝集一

十

右迎神歌八章章四句句三言

濬哲維祖長發其武帝出自震重光御寓七德
攸宣九疇咸叙靜難荆衡凝威蠡浦
昧旦丕承夕惕刑政化一車書德馨染盛昭星
夜景非雲曉慶衢室成陰壁水如鏡
禮充玉帛樂被匏絃於鑠在詠陟配于天自宮
祖兆靡愛牲牲我將我享永祚豐年

右卅祖武皇帝歌三章章八句句

四言

營翼日鳥殷宵凝冰泮玄螯昭

景陽陽風習習女夷歌東皇集

莫春酒秉青珪命田祖渥群黎

右青帝歌三章章四句句三言

惟此夏德德恢台兩龍在御炎精來

火景方中南譌秩靡草云黃含桃實

族雲翳鬱溫風煽興雨祁祁黍苗遍

右赤帝歌三章章二句句七言

稟火自高明毓金挺剛克涼燠資成化群方載
厚德

陽季勾萌達炎徂溽暑融商暮百工止歲極凌

陰冲

謝集一

十一

泉流疏已清原隰遠而一作甸已平咸言祚惟億斯

民保高京

右黃帝歌三章章四句句五言

帝說于允執矩固司藏百川收潦精景應金方

嘉樹離披榆闢命賓鳥夜月如霜金風方嫋嫋

商陰肅殺萬寶咸亦適勞哉望歲場功冀可收

右白帝歌三章章二句句九言

白日短玄夜深招搖轉移大陰霜鐘鳴冥陵起

星迴天月窮紀

聽嚴風來不息望玄雲黝無色曾冰冽積羽幽
飛雪至天山側

關梁閉方不巡合國吹饗蜡賓統微陽究終始
百禮洽萬祚臻

右黑帝歌三章章四句句六言

敬如在禮將周神之駕不少留

躍龍鑣轉金蓋紛上馳雲之外

警七曜詔八神排閭闔渡天津

有滄輿膚寸積雨冥冥又終夕

俾栖糧惟萬箱皇情暢景命昌

謝集一

十二

右送神歌五章章四句句三言

四言詩

侍宴華光殿曲水奉敕爲皇太子作

旁求遂古逖聽鴻名大寶曰位得一爲貞朱綈
叶祉綠字摛英外配同貫進讓殊聲

大橫將屬會昌已命國步中阻宸居膺慶重劔
先傳龜玉增映宗堯有緒復禹無競

禮行郊社人神受職寶效山川鱗羽變色玄塞

北靡丹徼南極浮毳駕風飛一作非泳登一作非陟

能官民秀利建天跼朽鶉列野營絳分區論思

帝則獻納宸樞麟趾方一作公定鷄翼誰濡

西京藹藹東都濟濟秋被濯流春袂浮醴初吉

去獻上除方啓昔駕陽頻一作穎今帳雲陞

嘉樂舊矣芳宴在斯載留神矚有睟天儀龍精
已映威仰未移葉依黃鳥花落春池

高殿弘敞禁林稠密青嶝崛起丹樓間出翠葆

隨風金戈動日惆悵清管徘徊輕佞

灑漑入筵河淇流乍海若一作媧谷來往觴肴汭沂

歡飶終日清光欲暮輕貂一作豹回道一作首華組

徐步終日一作終

謝集一

十三

登賢博望獻一作載賦清漳漢貳稱敏魏兩垂芳

監撫有則七鬯無方瞻言守器永媿元良

三日侍華光殿曲水宴代人應詔

群分未辯類聚茲式天睠休明且求至德御繁
實簡制動惟默官府百王衣裳萬國

中葉遭閔副內多違悠悠靈貺爰有適歸於昭

睿后撫運天飛疑居中縣神動外畿

縣象著明離光乃位我有儲德徽猷淵備長壽

察書龍樓廻轡重道上庠行遵儒肆

朝陽有幹布葉萋萋思皇威矣鶴羽高棲出馳

先輅入秉介珪瞻秦望井建魯分奎

求賢每勞得士方逸有覺斯順無文咸秩萬箱
惟重百鍤載卹屈草戒諛階冀紀日

文教已肅武節旣馳榮光可照合璧如規載懷
姑射尚想瑤池濯龍乃飾天淵在斯

作樂順動寶符時義上春初吉亦留淵寄紅樹
巖舒青莎一作蘊水被雕梁虹拖雲霓鳥跂

高縣甲帳周褰黼帷長筵列陛激水旋墀浮醪
聚蟻靈蔡呈姿河宗躍跼海介夔跣

弱腕纖腰遷延妙舞秦箏趙瑟殷勤促柱降席

謝集一

十四

連綏稱觴接武稽首萬年獻茲多祐

天地旣成泉流旣清薄暮沾幸屬奉文明將標
齊配刻掃秦京願馳龍漠飲馬縣旌

三日侍宴曲水代人應詔

神理內寂機象外融遺情汾水垂冕鴻宮樹以
司牧匪我求蒙徒勤日用誰器玄功

往晦必明來碩資蹇於皇克聖時乘御辯寶曆
載暉瑤光重踐昭昭舊物熙熙遷善

當宁日具求衣未明抵壁焚翠銷劔隳城九疇
式序三辟再清虞箴罔闕矇奏傳聲

麗景則春儀方在震重聖積厚金式瓊潤天爵
必諧王臣咸蓋譬諸華霍惟邦之鎮

正朔葱瀚冠冕邛越爭長明堂相趨魏闕龜象
南薦環裘西發巢閣易窺馴庭難弭

上巳惟昔于彼禊流祓穢河許張樂春疇旣停
龍駕亦汎鳧舟靈宮備矣無待茲遊

初駕命曉朝霞

一作華

開夜飾陞導源迴伊流灑

極望天淵曲阻謬榭閑館巖敞長廊水架

金觴搖蕩玉俎推移筵浮水豹席擾雲螭寥亮
琴瑟嗷咷填箎歡茲廣讌穆是天儀

謝集一

十五

周道如砥康衢載直徒媿玄黃負恩無力華輶
徒駕長纓未飾相彼失晨寧忘鼓翼

謝宣城詩集卷第一

謝宣城詩集卷第二

鼓吹曲

元會曲

二儀啓昌曆三陽應慶期
珪贄紛成序鯁譯憬
來思分階絕組練充庭羅翠旗
觴流白日下吹
溢景雲滋天儀穆藻殿萬宇壽皇基

郊祀曲

六宗禋配嶽五時奠甘泉
整蹕游九闕清簫開
八埏鎗鎗玉鑿動溶溶
金陣旋均宮光已屬
外柴禮既虔福饗雲之集
南嶽固斯年

謝集二

鈞天曲

高宴顥天臺置酒迎風觀
笙鏞禮百神鍾石動
雲漢瑤池寶瑟驚綺席
舞衣散紫鳳來參差
玄鶴至凌亂已慶明庭樂
誰想南風彈

右三曲頌帝功

入朝曲

江南佳麗地金陵帝王州
逶迤帶淶水迢遞起
朱樓飛甍夾馳道垂楊蔭御溝
凝笳翼高蓋疊鼓送華軒
獻納雲臺表功名良可收

出藩曲



雲枝紫微內分組承明阿飛艤遡極浦旌節去
關河眇眇蒼山色沉沉寒水波鏡音巴渝曲簫
鼓盛唐歌夫君邁惟德江漢仰清和

校獵曲

凝霜冬十月殺盛涼颯開原澤曠千里騰騎紛
往來平且望煙合烈火從風迴殪獸華容浦張
樂荆山臺虞人昔有喻明哲時戒哉

右三曲頌藩德

從戎曲

選旅辭輟轅弭節趨河源日起霜戈照風迴連

謝集二

二

旗翻紅塵朝夜合黃沙萬里昏嘹唳清笳轉蕭
條邊馬煩自勉輟耕願征役去何言

送遠曲

北梁辭歡宴南浦送佳人方衢控龍馬平路騁
朱輪瓊筵妙舞絕桂席羽觴陳白雲丘陵遠山
川時未因一爲清吹激潺湲傷別中

登山曲

天明開秀萼瀾光媚碧堤風盪翻鷲亂雲行芳
樹低暮春春服美游駕凌丹梯升嶠旣小魯登
巒豆悵齊王孫尚遊行蕙草芳萋萋

泛水曲

玉露沾翠葉金風鳴素枝罷遊平樂苑泛鷁昆明池旌旗散容裔蕭鼓吹參差日晚厭遵渚採菱贈清漪百年如流水寸心寧共知

右四曲

闕三字

同沈右率諸公賦鼓吹曲名先成爲次

芳樹

沈右率

約

發萼九華嶼開跼露寒側氛氲非一香參差多異色宿昔寒飈舉摧殘不可識霜雪交橫至對之長嘆息

謝集二

三

當對酒

范通直

雲

對酒心自足故人來共持方悅羅衿解誰念髮成絲徇往良爲達求名本自欺迨君當歌日及我傾樽時

臨高臺

眺時爲隨王文學

千里常思歸登臺瞻綺翼裁見孤鳥還未辦連山極四面動清風朝夜起寒色誰識一作念倦遊者嗟此故鄉憶

巫山高

王尹丞

韻

仿像巫山高薄暮陽臺曲煙華乍舒卷行芳時

斷續彼美如可期寤言紛在屬憮然坐相望秋
風下庭綠

有所思

劉中書繪

別離安可再而我更重之佳人不相見明月空
在帷共銜滿堂酌獨斂向隅眉中心亂如雲寧
知有所思

同前再賦

芳樹

馳

早翫華池陰復鼓滄洲柑檮旖旎芳若斯葳蕤紛
可繼霜下桂枝銷怨與飛蓬逝不厠玉盤滋誰

憐終萎細

謝集二

四

同前

融

相望早春日煙花雜如霧復此佳麗人含姿結
芳樹綺羅已自情萱風多有趣去來徘徊者佳
人不可遇

臨高臺

約

高臺不可望遠望使人愁連山無斷絕河水復
悠悠所思曖何在洛陽南陌頭可望不可至何
用解人憂

有所思

融

如何有所思而無相見時宿昔夢顏色階庭尋
履綦高歌更何已引滿終自期一作持欲知憂能
老爲視鏡中絲

巫山高

繪

高唐與巫山參差鬱相望灼爍在雲間氛氲出
霞上散雨收夕臺行雲卷晨帳出沒不易期嬋
娟似惆悵

同前

雲

巫山高不極白日隱光暉遥遥朝雲出冥冥暮
雨歸巖懸無獸跡林暗鳥疑飛枕席竟誰薦相

謝集二

五

望空依依

同賦雜曲名

陽春曲

檀秀才

青雲獻初歲白日映雕梁蘭萌猶自短菰菜未
能長已見花紅落復聞花蘂香樂此試遊衍誰
知心獨傷

淶水曲

江朝請

塘上蒲欲齊汀洲杜將歇春心旣易蕩春流豈
難越桂棹及春風菱影映初月芳草若可贈爲
君步羅襪

採菱曲

陶功曹

朝日映蘭澤乘風入桂嶼
棹歌已流倡輕舟復容與
勿遽佳期移方追明月侶
採採詎盈朶還望空延佇

秋竹曲

毗時爲宣城守

嬈娟綺窻北結根未參差
從風旣裊裊映日頗離離
欲求棗下吹別有江南枝
但能凌白雪貞心蔭曲池

白雪曲

朱孝廉

凝雲沒霄漢從風飛且散
連翩下幽谷徘徊依

謝集二

六

井幹旣興楚客謠亦動周王歎
所恨輕寒質不迨春歸旦

永明樂

第一

帝圖潤九有皇風浮四溟
永明一爲樂咸池無復靈

第二

民和禮樂富世清歌頌徽鴻
名軼卷領稱首邁垂衣

第三

朱臺鬱相望青槐紛馳道秋雲湛甘露春風散
芝草

第四

龍樓日月照淄館風雲清儲光温似玉藩度式
如瓊

第五

化洽鯁海君恩變龍庭長西北驚環表東南盡
龜象

第六

出車長洲苑選旅朝夕川絡絡結雲騎奕奕泛

謝集二

七

戈舡

第七

燕駟遊京洛趙服麗有暉清歌留上客妙舞送
將歸

第八

實相薄五禮妙化開六塵明祥已玉燭寶瑞亦
金輪

第九

生茂芊蘿性身與佳惠隆飛纓入華殿屣步出
重宮

第十

綵鳳鳴朝陽玄鶴舞清商瑞此永明曲千載今
爲皇

玉階怨

夕殿下珠簾流螢飛復息長夜縫羅衣思君此
何極

金谷聚

渠椀送佳人王楫要上客車馬一東西別後思
今夕

王孫遊

謝集二

八

綠草蔓如絲雜樹紅英發無論君不歸君歸芳
已歇

銅爵悲

落日高城上餘光入總帷寂寂深松晚寧知琴
瑟悲

江上曲

易陽春草出踟躕日已暮蓮葉向田田淇水不
可渡願子淹桂舟時同千里路千里旣相託桂
舟復容與江上可採菱清歌共南楚

曲池之水

緩步遵莓渚披襟待蕙風芙蓉舞輕蒂包筍出
芳叢浮雲自西北江海思無窮鳥去能傳響見
我綠琴中

綠琴一作測琴

同謝諮議詠銅爵臺

總帷飄井幹樽酒若平生鬱鬱西陵樹詎聞歌
吹聲芳襟染淚迹嬋媛空復情玉座猶寂漠况
乃妾身輕



謝宣城詩集卷第三

將發石頭上烽火樓

徘徊戀京邑躑躅躑曾阿陵高墀闕近眺迥風
雲多荆吳阻山岫江海合瀾波歸飛無羽翼其
如別離何

答王世子

飛雪天山來飄聚繩樞外蒼雲暗九重北風吹
萬籟有酒招親朋思與清顏會熊席惟尔安羔
裘豈吾帶公子不垂堂誰肯憐蕭艾

答張齊興

荆山從百里漢廣流無極北馳星啓正南望朝
雲色川隰同幽快冠冕異今昔子肅兩歧功我
滯三冬職誰知京洛念髣髴昆山側向夕登城
壕潛池隱復直地迫聞遙蟬天長望歸翼清文
忽景麗思泉紛寶飾勿言脩路阻勉子康衢力
曾崖寂且寥歸軫逝言陟

酬王晉安

稍稍枝早勁塗塗露晚晞南中榮橘柚寧知鴻
鴈飛拂霧朝青閣日旰坐彤闈悵望一途阻參
差百慮依春草秋更綠公子未西歸誰能以京

洛緇塵染素衣

暫使下都夜發新林至京邑贈西府

同僚

大江流日夜客心悲未央徒念關山近終知返
路長秋河曙耿耿寒渚夜蒼蒼引領見京室宮
雉正相望金波麗鳩鵲玉繩低建章驅車鼎門
外思見昭丘陽馳暉不可接何況隔兩鄉風煙
有鳥路江漢限無梁常恐鷹隼擊時菊委嚴霜
寄言罽羅者寥廓已高翔

始出尚書省

謝集三

二

惟昔逢休明十載朝雲陛既通金閨籍復酌瓊
筵醴宸景厭照臨昏風淪繼體紛虹亂朝日濁
河穢清濟防口猶寬政餐荼更如薺英袞暢人
謀文明固天啓青精翼紫軼黃旗映朱邸還覩
司隸章復見東都禮中區咸已泰輕生諒昭洒
趨事辭宮闕載筆陪旌祭邑里向踈蕪寒流自
清泚衰柳尚沈沈凝露方泥泥零落悲友朋歡
娛宴兄弟既秉丹石心寧流素絲涕因此得蕭
散垂竿深澗底

直中書省

紫殿肅陰陰彤庭赫弘敞風動萬年枝日華承
露掌玲瓏結綺錢深沉映朱網紅藥當階翻蒼
苔依砌上茲言翔鳳池鳴珮多清響信美非吾
室中園思偃仰朋情以鬱陶春物方駘蕩安得
凌風翰聊恣山泉賞

觀朝雨

朔風吹飛雨蕭條江上來旣灑百常觀復集九
成臺空濛如薄霧散漫似輕埃平明振衣坐重
門猶未開耳目暫無擾懷古信悠哉戢翼希驥
首乘流畏曝鯁動息無兼遂歧路多徘徊方同
戰勝者去翦北山萊

謝集三

三

新亭渚別范零陵雲

洞庭張樂地瀟湘帝子游雲去蒼梧野水還江
漢流停驂我悵望輟棹子夷猶廣平聽方籍茂
陵將見求心事俱已矣江上徒離憂

之宣城郡出新林浦向板橋

江路西南永歸流東北驚天際識歸舟雲中辨
江樹旅思倦搖搖孤游昔已屢旣懽懷祿情復
協滄洲趣囂塵自茲隔賞心於此遇雖無玄豹
姿終隱南山霧

始之宣城郡

下帷闕章句高談愧名理踈散謝公卿蕭條依
掾史簪髮逢嘉惠教義承君子心迹苦未并憂
歡將十祀幸霑雲雨慶方轡叅多士振鷺徒追
飛群龍難隸齒烹鮮止貪競共治屬廉耻伊余
昧損益何用祇千里解劔北宮朝息駕南川涘
寧希廣平詠聊慕華陰市棄置宛洛遊多謝金
門裏招招漾輕楫行行趨巖趾江海雖未從山
林於此始

宣城郡內登望

謝集三

四

借問下車日匪直望舒圓寒城一以眺平楚正
蒼然山積陵陽阻溪流春穀泉威紆距遙甸巉
岳帶遠天切切陰風暮桑柘起寒煙悵望心已
極怊怳魂屢遷結髮倦爲旅平生早事邊誰規
鼎食盛寧要狐白鮮方棄汝南諾言稅遼東田
冬日晚郡事隙

案牘時間暇偶坐觀卉木颺颺滿池荷脩脩蔭
惣竹簷隙自周流房攏閑且肅蒼翠望寒山崢
嶸瞰平陸已惕慕歸心復傷千里目風霜旦夕
甚蕙草無芬馥云誰美笙簧孰是厭邁軸願言

追逸駕臨潭餌秋菊

後齋迥望

高軒瞰四野臨牖眺襟帶望山白雲裏望水平
原外夏木轉成帷秋荷漸如蓋輦洛常睠然搖
心似懸旆

落日悵望

昧旦多紛喧日晏未遑捨落日餘清陰高枕東
牕下寒槐漸如束秋菊行當把借問此何時涼
風懷朔馬已傷慕歸客復思離居者情嗜幸非
多案牘偏爲寡既乏琅邪政方憩洛陽社

謝集三

五

望三湖

積水照頰霞高臺望歸翼平原周遠近連汀見
紆直葳蕤向春秀芳黃共秋色薄暮傷哉人嬋
媛復何極

遊山

託養因支離乘閑遂疲蹇語默良未尋得喪云
誰辨幸泣山水都復值清冬緬凌崖必千仞尋
谿將萬轉堅嶠旣峻增迴流復宛澶杳杳雲竇
深淵淵石溜淺傍眺鬱篋篋還望森栴榎荒隩
被歲莎崩壁帶苔蘚鼯狖叫層岵鷗鳧戲沙衍

觸賞聊自觀，即趣咸已展。經目惜所遇，前路欣
方踐。無言蕙草歇，留垣芳可搦。尚子時未歸，邴
生思自免。求志昔所欽，勝迹今能選。寄言賞心
客，得性良爲善。

賽敬亭山廟喜雨

夕帳懷椒糝，蠲景潔滸薌。登秋雖未獻，望歲佇
年祥。潭淵深可厲，狹斜車未方。蒙籠度絕限，出
沒見林堂。秉玉朝群帝，樽桂迎東皇。排雲接虬
蓋，蔽日下霓裳。會舞紛瑤席，安歌遶鳳梁。百味
芬綺帳，四座沾羽觴。福被延珉澤，樂極思故鄉。

謝集三

六

登山騁歸望，原雨晦茫茫。胡寧昧千里，解佩拂
山莊。

祀敬亭山廟

翦削兼太華，崢嶸跨玄圃。貝闕眊阿宮，薜帷陰
網戶。參差時未來，徘徊望澧浦。椒醑若馨香，無
絕傳終古。

遊敬亭山

茲山亘百里，合沓與雲齊。隱淪旣已託，靈異居
然棲。上干蔽白日，下屬帶迴溪。交藤荒且蔓，樛
枝聳復低。獨鶴方朝唳，饑鶩此夜啼。泄雲已漫

漫夕雨亦淒淒我行雖紆組兼得尋幽蹊緣源
殊未極歸徑窅如迷要欲追竒趣即此陵丹梯
皇恩竟已矣茲理庶無睽

賦貧民田

假一作佳遇一作譽非將迎靖共一作靜拱延殊慶中歲

歷三臺旬月典邦政會一作曾是共治一作怡情敢

忘卹貧病將無富教禮孰有知方性躬本抑工

商均業省兼并察壤見泉脉覘星視農正黍稷

綠高殖櫛一作稊稌即卑盛舊埒新塍分青苗白

水映遙樹匝清陰連山周遠淨即此風雲佳孤

謝集三

七

觴聊可命既微三載道庶藉兩歧詠俾爾倉廩
實余從谷口鄭

與江水曹至濱于戲

山中上芳月故人清樽賞遠山翠百重迴流映
千文花枝聚如雪蕪絲散猶網別後能相思何
嗟異封壤

送江水曹還遠館

高館臨荒途清川帶長陌上有流思人懷舊望
歸客塘邊草雜紅樹際花猶白日暮有重城何
由盡離席

送江兵曹檀主簿朱孝廉還上國

方舟泛春渚，携手趨上京。安知慕歸客，詎億山中情。
香風藥上發，好鳥葉間鳴。揮袂送君已，獨此夜琴聲。

臨溪送別

悵望南浦時，徒倚北梁步。葉下涼風初，日隱輕霞暮。
荒城迥易陰，秋溪廣難渡。沫泣豈徒然，君子行多露。

將遊湘水尋句溪

既從陵陽釣桂鱗，赤螭方尋桂水原。謁帝蒼山垂辰哉，且未曾乘景。
弄清漪，瑟汨瀉長淀潺。爰赴兩歧輕蘋上，靡靡雜石下離離。
寒草分花映戲鮪，乘空移興以暮秋。月清霜落素枝魚鳥，
余方翫纓綉君自縻。及茲暢懷抱山川長若斯，忝役湘州與宣城吏民別。

弱齡倦簪履，薄晚忝華奧。閑沃盡地區，山泉諧所好。
幸遇昌化穆，惇一作淳俗罕驚暴。四時從偃息，三省無侵冒。
下車遽暄席，紆紆始黔竈。榮辱未皇敷，德禮何由導。
汨徂奉南岳，兼秩典邦號。疲馬方云驅，鉛刀安可操。
遺惠良寂寞，恩靈亦

匪報桂水日悠悠結言幸相勞吐納貽爾和窮
通昂所蹈

休沐重還丹陽道中

薄游第從告思閑願罷歸還叩歌賦似休汝車
騎非灞池不可別伊川難重違汀葭稍靡靡江
菼復依依田鵠遠相叫沙鶉忽爭飛雲端楚山
見林表吳岫微試與征徒望鄉淚盡沾衣賴此
盈罇酌含景望芳菲問我勞何事霑沐仰清徽
志狹輕軒冕恩甚戀閨闈歲華春有酒初服偃
郊扉

謝集三

九

移病還園示親屬

疲策倦人世歛性就幽蓬停琴佇涼月滅燭聽
歸鴻涼薰乘暮晰秋華臨夜空葉低知露密崖
斷識雲重折荷葺寒袂開鏡眄衰容海暮騰清
氣河關秘棲冲烟衡時未歇芝澗去相從

出下館

麥候始清和涼雨銷炎燠紅蓮搖弱荇丹藤繞
新竹物色盈懷抱方駕娛耳目零落既難留何
用存華屋

游東田

戚戚苦無棕，携手共行樂。尋雲陟累榭，隨山望
菌閣。遠樹曖芊芊，生煙紛漠漠。魚戲新荷動，鳥
散餘花落。不對芳春酒，還望青山郭。

秋夜講解

四緣去誰肇，七識習未央。沉沉一作淵淵倒營魄，苦

蔭蹙愁腸。琴瑟徒爛熳，姱容空滿堂。春顏遽幾

日，秋壑終茫茫。孰云濟沉溺，假願託津梁。惠唱

摘泉湧，妙演發金相。空有定無執，實實固兩忘。

自來乘首夏，及此申暮霜。雲物清晨景，衣巾引

夕涼。風振蕉蓬裂，霜下梧楸傷。一作露下六龍

謝集三

十

且無借三相，寧久長。何時接靈應，及子同舟航。

秋夜

秋夜促，織鳴南鄰。擣衣急，思君隔九重。夜夜空
佇立，北窻輕幔垂。西戶月光入，何知白露下。坐
視階前濕，誰能長分居。秋盡冬復及。

春思

茹溪發春水，毗山起朝日。蘭色望已同，萍際轉
如一。巢鷺聲上下，黃鳥弄儔匹。邊郊阻遊衍，故
人盈契闊。夢寐藉假簧，思歸賴倚瑟。幽念漸鬱
陶，山楹永爲室。

治宅

結宇夕陰街荒途橫九曲迢遞南川陽逆邈西
山足闢館臨秋風敞窻望寒旭風碎池中荷霜
翦江南菖旣無東都金且稅東臯粟

冬緒羈懷示蕭諮議虞田曹劉江二
常侍

去國懷丘園入遠滯城闕寒燈耿宵夢清鏡悲
曉髮風草不留霜冰池共如月寂寞此閑帷琴
樽任所對客念坐嬋媛年華稍菴夢夙慕雲澤
遊共奉荆臺績一作一聽春鶯喧再視秋虹沒

謝集三

十一

疲驂良易返恩一作思波不可越誰慕臨淄鼎常
希茂陵渴依隱幸自從求心果蕪昧方軫歸歟
願故山芝未歇

懷故人

芳洲有杜若可以贈佳期望望忽超遠何由見
所思我行未千里山川已間之離居方歲月故
人不在茲清風動簾夜孤月照窻時安得同携
手酌酒賦新詩

夜聽妓二首

瓊閨釧響聞瑤席芳塵滿要取洛陽人共命江

南管情多舞態遲意傾歌弄緩知君密見親寸
心傳玉椀

上客光四座佳麗直千金挂釵報纓絕愔珥答
琴心娥眉已共笑清香復入衿歡樂夜方靜翠
帳垂沉沉

京路夜發

擾擾整夜裝肅肅戒徂兩曉星正寥落晨光復
泱泱猶霑餘露團稍見朝霞上故鄉邈已愛山
川脩且廣文奏方盈前懷人去心賞敕躬每跼
踏瞻恩惟震蕩行矣倦路長無由稅歸鞅

謝集三

十二

晚登三山還望京邑

灞涘望長安河陽視京縣白日麗飛甍參差皆
可見餘霞散成綺澄江靜如練喧鳥覆春洲雜
英滿芳甸去矣方滯淫懷哉罷歡宴佳期悵何
許淚下如流霰有情知望鄉誰能鬢不變

高齋視事

餘雪映青山寒霧開白日曖曖江村見離離海
樹出披衣就清盥憑軒方秉筆列俎歸單味連
駕止容膝空爲大國憂紛詭諒非一安得掃蓬
徑銷吾愁與疾

郡內高齋閑望答呂法曹

呂僧環
齊王法曹

結構何迢遞曠望極高深窻中列遠岫庭際俯
喬林日出衆鳥散山暝孤猿吟已有池上酌復
此風中琴非君美無度孰爲勞寸心惠而能好
我問以瑤華音若遺金門步見就此山岑

此一作玉

謝宣城詩集卷第三

謝集三

十三



謝宣城詩集卷第四



直石頭

蕭衍

率土皆王土安知全高尚東壟弃黍稷西遊入
卿相屬逢利建始投分叅末將尺一功未施河
山賞已諒攝官因時暇曳裾聊起望鬱盤地勢
遠參差百雉壯翠壁絳霄際丹樓青霞上夕池
出濠渚朝雲生疊嶂籠鳥易爲恩屠羊無飾讓
泰階端且平海水本無浪小臣何日歸頓轡從
閑放

和蕭中庶直石頭

謝集四

一

九河亘積岨三夔鬱旁眺皇州揔地德回江欸
巖徼井幹絕蒼林雲夢蔽層嶠川霞旦上薄山
光晚餘照翔集亂歸飛虹蜺紛引曜君子奉神
略瞰迥馮重峭彈冠已籍甚升車益英妙功存
漢策書榮並周庭燎汲疾移偃息董園倚談笑
麾旆一悠悠謙姿光且劭讌嘉多暇日興文起
淵調日余厠鱗羽滅影從漁釣澤渥資投分逢
迎典待詔詠沼邈含毫專城空坐嘯徒慙皇鑒
揆終延曲士諂方追隱淪訣偶解金丹要若偶
巫咸招帝閭良可叫

經劉瓛墓下 隨郡王蕭子隆

升堂子不謬問道余未窮如何辭白日千載隔
音通山門一已絕長夜緬難終初松切暮鳥新
楊摧曉風榛關向蕪密泉途轉銷空

登山望雷居士精舍同沈左衛過劉
先生墓下作并序 竟陵王蕭子良

沛國劉子珪學優來仕跡邇心遐履信體仁古
之遺德潛舟迅景滅賞淪輝言念芳猷式懷嗟
述屬舍第隨郡有示來篇彌緝久要之情益深
宿草之歎升望西山率爾爲荅雖因事雷生實

申悲劉子云爾

謝集四

二

漢陵淹館蕪晉彌洙風缺五都聲論空三河文
義絕興禮邁前英談玄踰往哲明情日夜深徽
音歲時滅垣并摠已平煙雲從容裔尔嘆牛山
悲我悼驚川逝

奉和

虞炎

下帷聞昔儒窺園信且逸聚學叢煙郊栖道事
環華戢景謝歸年稅駕空悠日庭露已霑衣松
門向蕭瑟憫神念周依依惠言密

奉和

柳惲

西河寂高業北海望清塵曾徽誰與寄尚德在
伊人遺文重昭晰絕緒復紛綸露華白朝日蘭
生無久春芳猷動淵思撫軾履高辰山風起寒
木野雀亂秋榛龍章時易宿素軌邈難遵

奉和

沈約

表閭欽逸軌軾墓禮貞蒐化塗終眇默神理曖
猶存塵駕未輟幌高衡已委門日蕪子雲舍徒
望董生園華陰無遺市楚席有靈樽玄泉儻能
慰長夜且勿論

奉和竟陵王同沈右率過劉先生墓

謝集四

三

嘉樹因枝條琢玉良可寶若人陵曲臺垂帷茂
淵道善誘宗學原鳴鍾霽幽抱仁焉徂宛洛清
徽夜何早歲晚結松陰平原亂秋草不有至言
揚終滯西山老

離夜

玉繩隱高樹斜漢耿層臺離堂華燭盡別幌清
琴哀翻潮尚知限客思眇難裁山川不可夢况
及一作乃故人杯

同前

江丞

石泉行可照蘭杜向含風離歌上春日芳思徒

以空情遽曉雲發心在夕河終幽琴一罷調清
醕誰復同

同前

王常侍

月没高樓曉雲起扶桑時燭筵曖無色行住憫
相悲當軒已疑念况乃清江湄懷人忽千里誰
緩鬢組絲

餞謝文學

沈右率

漢池水如帶巫山雲似蓋滌汨背吳潮潺湲橫
楚潮一望沮漳水寧思江海會以我徑寸心從
君千里外

謝集四

四

同前

虞別駕

差池燕始飛羃歷草初輝離人悵東顧遊子去
西歸清潮已駕渚溽露復沾衣一乖當春聚方
掩故園扉

同前

范通直

陽臺霧初解夢渚冰裁綠遠山隱不見平沙斷
還續分絃饒苦音別唱多悽曲尔拂後車塵我
事東臯粟

同前

王中書

所知共歌吹誰忍別笑歌離軒思黃鳥分渚夢

青莎翻情結遠
旆灑淚與煙波
春江夜明月還
望情如何

同前

蕭記室

執手無還顧別者
有西東荆吳渺何際
煙波千里通
春篁方解籜弱柳向低風
相思將安寄
悵望南飛鴻

向一作尚

同前

劉中書

汀洲千里芳朝雲
萬里色悠然在天隅
之子去安極
春潭無與窺
秋臺共誰陟
不見一佳人
徒望西飛翼

謝集四

五

和別沈右率諸君

春夜別清樽
江潭復爲客
歎息東流水
如何故鄉陌
重樹日芬蓋
芳洲轉如積
望望荆臺下
歸夢

一作轉望相思夕

卧疾叙意

王秀之

貞悔不少期
福極固難豫
疾藥雖一途
遂以千百慮
景仄念徂齡
帶緩每危曙
循躬雖

一作既

已

茲况復歲將暮
層冰日夜多
飛雲密如霧
歸鴻互斷絕
宿鳥莫能去
輟我丘中瑟
良田一嗟故
隱淪迹有違
宰官功未樹
何用攬余情
恨恨此

故路豈言勞者歌且曰幽人賦

和王長史卧病

岬岫欵崇崔汎別朝洪河兔園文雅盛章臺冠
蓋多淵襟眷睿岳燮贊動吐歌顧影慙駢服載
筆旅江沱縞衣紛可獻琴言暖一作暖已和青臯
向還色春潤視生波巖垂變好鳥松上改陳蘿
日與歲眇邈歸恨積一作稍蹉跎願緝吳山社寧
袂楚池荷清風豈孤劭功遂懷曾阿勿藥良有
暢荏苒芳未過幸留清樽味言藉故田莎

行園

沈約

謝集四

六

寒瓜方卧壟秋菰亦滿陂紫茄紛爛熳綠芋鬱
參差初菘向堪把時韭日離離高梨有繁實何
減萬年枝荒渠集野鴈安用昆明池

和沈祭酒行園

清淮左長薄荒徑隱高蓬回潮旦夕上寒渠左
右通霜畦紛綺錯秋町鬱蒙茸環梨縣已紫珠
榴拆且紅君有棲心地伊我歡既同何用甘泉
側玉樹望青蔥

北戍琅邪城

江孝嗣

驅馬一連翩日下情不息芳樹似佳人惆悵余

何極薄暮苦羈愁終朝傷旅食丈夫許人世安
得顧心臆按劍勿復言誰能耕與織

和江丞北戍琅邪城

春城麗白日阿閣跨曾樓蒼江忽渺渺驅馬復
悠悠京洛多塵霧淮濟未安流豈不思撫劍惜
哉無輕舟夫君良自勉歲暮勿淹留

昧旦出新亭渚

徐勉

驅車凌早術山華映初日攬轡且徘徊復值清
江謐杳藹楓樹林參差黃鳥匹氣物宛如斯重
以心期逸春堤一遊衍終朝意殊悉

謝集四

七

和徐都曹出新亭渚

宛洛佳遨遊春色滿皇州結軫青郊路迴瞰滄
江流日華川上動風光草際浮桃李成蹊逕桑
榆蔭道周東都已倣載言歸望綠疇

入琵琶峽望積布磯

劉繪

江山信多美此地最爲神以茲峯石麗重在芳
樹春照爛虹蜺雜交錯錦繡陳差池若燕羽削
芳似龍鱗却瞻了非向前觀復已新翠微上虧
景青莎下拂津嶮巖如刻削可望不可親昔途
首遐路未獲究清塵誓將返初服歲暮請爲鄰

和

昔余侍君子歷此遊荆漢山川隔舊賞朋僚多
雨散圖南矯風翮曾非息短翰移疾覲新篇披
衣起淵翫惆悵懷昔踐彷彿得殊觀頽紫共彬
駁雲錦相凌亂奔星上未窮驚雷下將半回潮
漬崩樹輪囷輒傾岸巖篠或傍翻石筍無脩幹
澄澄明浦湄行行清風爛江潭良在目懷賢興
累嘆歲暮不我期淹留絕巖畔

在郡卧病呈沈尚書

淮陽股肱守高卧猶在茲况復南山曲何異幽

謝集四

八

棲時連陰盛農節臺笠聚東菑高閣常晝掩荒
階少諍辭珍簟清夏室輕扇動涼颺嘉魴聊可
薦綠蟻方獨持夏李沉朱實秋藕折輕絲良辰
竟何許夙昔夢佳期坐嘯徒可積爲邦歲已暮
絃歌終莫取撫枕一作机今自嗤

荅謝宣城

沈約

王喬飛鳧鳥東方金馬門從宦非宦侶避世不
避喧揆余發皇鑿短翮屢飛翻晨趨游建禮晚
沐卧郊園賓至下塵榻憂來命綠樽苛賢侔時
雨今守馥蘭孫神交疲夢寐路遠隔思存牽拙

謬東汜浮情反西崑顧循良菲薄何以儷瓊璫
將隨渤澥去刷羽況清源

和何議曹郊遊二首

春心澹容與挾弋步中林朝光映紅萼微風吹
好音江垂得清賞山際果幽尋未嘗遠別離知
此愜歸心流沂終靡已嗟行方至今
江臯倦遊客薄暮懷歸者揚舲浮大川惆悵至
日下霾靡青莎被潺湲石溜瀉寄語持笙簧舒
憂願自假歸途豈難涉翻同江上夏

和劉西曹望海臺

謝集四

九

滄波不可望望極與天平往往孤山映處處春
雲生差池遠鴈沒颺沓群鳧驚囂塵及簿領棄
捨出重城臨川徒可羨結網庶時營

和王中丞聞琴

涼風吹月露圓景動清陰蕙氣入懷抱聞君此
夜琴蕭瑟滿林聽輕鳴響澗音無爲澹容與蹉
跎江海心

和伏武昌登孫權故城

炎靈遺劔璽當塗駭龍戰聖期缺中壤霸功興
寓縣鵲起登吳山鳳翔陵楚甸衿帶窮巖險帷

帟盡謀選北拒溺駢驪西戡收組練江海旣無
波俯仰流英盼裘冕類禋郊卜揆崇離殿釣臺
臨講閱樊山開廣讌文物共葳蕤聲明且葱蒨
三光厭分景書軌欲同薦參差卅祀忽寂寞市
朝變舞館識餘基歌梁想遺囀故林衰木平荒
池秋草徧雄圖悵若茲茂宰深遐睠幽客滯江
臯從賞乖纓弁清卮阻獻酬良書限聞見幸藉
芳音多承風采餘絢于役儻有期鄂渚同遊行

夏始和劉尋陵

威仰弛蒼郊龍曜表皇隲春色卷遙甸炎光麗

謝集四

十

近邑白蘋望已騁細荷紛可襲徒願尺波旋終
憐寸景戢對窻斜日過洞幌鮮鱗入浮雲去欲
窮暮鳥飛相反柔翰縝芳塵清源非易揖迴江
難絕濟云誰暢佇立良宰曷夜漁出入事朝汲
績羽余旣裳更賦子盈粒倚梧何必零歸來共
栖集

和宋記室省中

落日飛鳥還憂來不可極行樹澄遠陰雲霞成
異色懷歸欲乘電瞻言思解翼清揚婉禁居秘
此文墨職無嘆阻琴樽相從伊水側

和王著作八公山 韻

二別阻漢坻雙峭望河澳茲嶺復嶺岼分區奠
淮服東限瑯琊臺西距孟諸陸仟眠起雜樹檀
藥蔭脩竹日隱澗疑空雲聚岫如複出沒眺樓
雉遠近送春日戎州昔亂華素景淪伊穀貼危
賴宗衮微管寄明牧長蛇固能翦奔鯨自此暴
蒲卜切道峻芳塵流業遙年運儵平生仰令圖于
嗟命不淑浩蕩別親知連翩戒征軸再遠館娃
宮兩去河陽谷風煙四時犯霜露一作雨朝夜沐
春秀良已凋秋場庶能築

謝集四

十一

和王主簿季哲怨情

掖庭聘絕國長門失歡宴相逢詠薜蘿辭寵悲
團一作班扇花叢亂數蝶風簾入雙鷺徒使春帶
賒坐惜紅顏變生平一顧重宿昔千金賤故人
心尚爾故心人不見一作故人

贈王主簿二首

日落窻中坐紅粧好顏色舞衣襞未縫流黃覆
不織蜻蛉草際飛游蜂花上食一遇長相思願
寄連翩翼

清吹要碧玉調絃命綠珠輕歌急綺帶含笑解

羅襦餘曲詎幾許高駕且踟躕徘徊韶景暮惟
有洛城隅

同王主簿有所思

佳期未歸望望下鳴機徘徊東陌上月出行
人稀

落日同儀曹

照

參差複殿影氛氲綺羅雜風入天淵池艾荷搖
復合遠聽雀聲聚回望樹陰杳一賞桂樽前寧
傷蓬鬢殿

和紀叅軍服散得益

謝集四

十三

金液稱九轉西山歌五色鍊質乃排雲濯景終
不測雲英亦可餌且駐羲和力能令長卿卧暫
故遇真識

新治北窻和何從事

國小暇日多民淳紛務屏闢牖期清曠開簾候
風景泱泱日照溪團團雲去嶺岩蕘蘭撩峻駢
闐石路整池北樹如浮竹外山猶影自來彌弦
望一作及君臨箕穎清文蔚且詠微言超已領
超一作怡不見城壕側思君朝夕頃迴舟方在辰何
以慰延頸

同羈夜集

積念隔炎涼
驤言始今夕
已對濁樽酒
復此故鄉客
霜月始流砌
寒蛸早吟隙
幸藉京華遊
邊城讌良席
樵採咸共同
荆莎聊可藉
恐君城闕人
安能久松栢

謝宣城詩集卷第四

謝宣城詩集卷第五



奉和隨王殿下

其一

玄冬寂脩夜天圍靜且開
亭臯霜氣愴松宇清
風來高琴時以思幽人多載懷
幸藉汾陽想嶺首正徘徊

其二

高秋夜方靜神居肅且深
閑階塗廣露涼宇澄
月陰嬋娟影池竹踈蕪散風林淵
情協爽節詠言興德音闇
道空已積遷直愧蓬心

謝集五

一

其三

愴愴緒風興祁祁族雲布
嚴氣集高軒稠陰結
寒樹日月謬論思朝夕承清豫
徒藉小山文空揖章臺賦

其四

星回夜未艾洞房凝遠情
雲陰滿池榭中月懸
高城喬木含風霧行鴈飛且鳴
平臺盛文雅西園富群英
芳慶良永矣君王嗣德聲
眷此伊洛詠載懷汾水情
顧已非麗則恭惠奉仁明
觀淄詠已失憮然媿簪纓

其五

肅景遊清都脩簪待蘭室累榭踈遠風廣庭麗
朝日穆穆神儀靜愔愔道言密一食繫靈表無
吝科年曆

其六

神心遺魏闕冲想顧汾陽肅景懷辰豫捐玦翦
山楊時惟清夏始雲景曖含芳月陰洞野色日
華麗池光草合亭臯遠霞生川路長端坐聞鶴
引靜瑟愴復傷懷哉泉石思歌詠鬱瓊相塘春
多迭駕言從伊與商衮職眷英覽獨善伊何忘
願輟東都遠弘道侍云梁

謝集五

二

其七

清房洞已靜閑風伊夜來雲生樹陰遠軒廣月
容開宴私移燭飲遊賞藉琴臺風猷冠淄鄴社
烏愧唐枚

其八

方池含積水明流皎如鏡規荷承日炫影鱗與
風泳上善叶淵心止川測動性幸是芳春來側
點游濠盛

其九

浮雲西北起飛來下高堂合散輕惟表飄舞桂
臺陽遙階收委羽平池如夜光眷言金玉照顧
慙蘭蕙芳

其十

睿心重離拆岐路清江隈四面寒颯舉千里白
雲來川長別管思地迥翻旗回還顧昭陽闕超
遠章華臺置酒巫山日爲君停玉柅

十一

桂樓飛絕限超遠向江岐輕雲霽廣甸微風散
清漪連連絕鴈舉眇眇青煙移嚴城亂芸草霜

謝集五

三

塘彫素枝氣爽深遙矚豫永聊停曦印一作已
終可悅盈思且若斯

十二

炎光缺風雅宗霸拯時淪龍德待雲霧令圖方
再晨歲遠荒城思霜華宿草陳英威遽如是徘
徊岐路人

十三

念深冲照廣業闡清化玄端儀穆金殿教藻
瓊筵船湛輕帷諠磬轉芳風旋卷轡栖道樹方
津棹法舫歸興憑大造昭塗良易筌

十四

分悲玉瑟斷別緒金樽傾風入芳帷散釭華蘭
殿明想折中園草共知千里情行雲故鄉色贈
子一離聲

十五

年華豫已滌夜艾賞方融新萍時合水弱草未
勝風閨幽瑟易響臺迥月難中春物廣餘照蘭
萱佩未窮

十六

漣漪映餘雪嚴城限深霧清寒起洞門東風急
池樹神居望已肅徘徊舉冲趣栖歸如歸詠丘
山不可屢

謝集五

四

詠風

徘徊發紅萼歲蕤動綠葳垂楊低復舉新萍合
且離步檐行袖靡當戶思衿披高響飄歌吹相
思子未知時拂孤鸞鏡星鬢視參差

詠竹

前窻一叢竹青翠獨言竒南條交北葉新筍雜
故枝月光踈已密風來起復垂青扈飛不礙黃
口得相窺但恨從風籜根株長別離

詠薔薇

低枝詎勝葉輕香幸自通發萼初攢紫餘采尚
霏紅新花對白日故蘂逐行風參差不俱曜誰
肯盼微藜

詠蒲

離離水上蒲結水散爲珠間厠秋菡萏出入春
鳧雛初萌實雕俎暮蘂雜椒塗所悲堂上曲遂
鑠黃金軀

詠兔絲

輕絲旣難理細縷竟無織爛熳已萬條連綿復
一色安根不可知縈心終不測所貴能卷舒伊
用蓬生直

謝集五

五

詠落梅

新葉初冉冉初蘂新霏霏逢君後園讌相隨巧
笑歸親勞君玉指摘以贈南威用持挿雲髻翡
翠比光輝日暮長零落君恩不可追

遊東堂詠桐

孤桐北窻外高枝百尺餘葉生旣婀娜葉落更
扶踈無華復無實何以贈離居裁爲圭與瑞足
可命參墟

詠牆北梔子

有美當階樹霜露未能移金蕢發朱采映日以
離離幸賴夕陽下餘景及西枝還思照淥水君
階無曲池餘榮未能已晚實猶見竒復留傾侔
德君恩信未貲

同詠樂器

琵琶

王融

抱月如可明懷風殊復清絃中傳意緒花裏寄
春情掩抑有竒態淒鏘多好聲芳袖幸時拂龍
門空自生

謝集五

六

箴

沈約

江南簫管地妙響發孫枝殷懃寄玉指含情舉
復垂雕梁再三繞輕塵四五移曲中有深意丹
誠君詎知

琴

洞庭風雨榦龍門生死枝雕刻紛布濩沖響鬱
清危一作危春風搖蕙草秋月滿華池是時操別

鶴遙遙客淚垂

蕙草一作綺草

同詠坐上器玩

竹櫝榔盤 沈約

梢風有勁質柔用道非一平織方以文穹成圓
且密薦羞雖百品所貴浮天實幸承歡醕餘寧
辭嘉宴畢

烏皮隱几

蟠木生附枝刻削豈無施取則龍文鼎三趾獻
光儀勿言素韋潔白沙尚推移曲躬奉微用聊
承終宴疲

同詠坐上所見一物

幔

王融

幸得與珠綴幕歷君之楹月映不辭卷風來輒

謝集五

七

自輕每聚金鑪氣時駐玉琴聲但願置樽酒蘭
釭當夜明

簾

虞炎

青軒明月時紫殿秋風日瞳矐引光輝曖曖映
容質清露依檐垂蛸絲當戶密塞開誰共臨掩
晦獨如失

席

柳惲

照日汀洲際搖風綠潭側雖無獨蠶絲幸有青
袍色羅袖少輕塵象床多麗飾願君蘭夜飲佳
人時宴息

同前

本生朝夕池落景照參差汀洲蔽杜若幽渚奪
江籬遇君時採擷玉座奉金卮但願羅衣拂無
使素塵彌

詠竹火籠

沈約

結根終南下防露復披雲雖爲九華扇聊可滌
炎氛安能偶狐白鶴卵織成文覆持鴛鴦被百
和吐氛氲忽爲織手用歲暮待羅裙

同前

庭雪亂如花井水粲成玉因炎入貂袖懷溫奉

謝集五

八

芳褥體密用宜通文邪性非曲本自江南墟娘
娟脩且綠暫承君玉指請謝陽春旭

詠鏡臺

玲瓏類丹檻茗亭似玄闕對鳳懸清冰垂龍掛
明月照粉拂紅粧插花理雲髮玉顏徒自見常
畏君情歌

詠燈

發翠斜溪裏蓄寶宕山峯抽莖類仙掌銜光似
燭龍飛蛾再三繞輕花四五重孤對樹作相思
夕空照舞衣縫

詠燭

杏梁賓未散桂宮明欲沈暖色輕帷裏低光照

寶

一作瑤

琴徘徊雲髻影灼爍綺疏金恨君秋月

夜遺我洞房陰

詠邯鄲故才人嫁爲廝養卒婦

生平宮閣裏出入侍丹墀開笥方羅縠窺鏡比
蛾眉初別意未解去久日生悲顛悴不自識嬌
羞餘故姿夢中忽彷彿猶言承讌私

詠溪鵝

蕙草含初芳瑤池暖晚色得廁鴻鸞影晞光弄

謝集五

九

羽翼

聯句

阻雪

積雪皓陰池北風鳴細枝九達密如繡何爲遠

別離

眺

風庭舞流霰冰沼結文澌飲春離以燠

欽賢紛若馳

江秀才革

珠囊條間響玉雷檐下垂栝

酒不相接寸心良共知

王丞融

飛雲亂無緒結冰

明曲池雖乖促席讌白首信勿虧

王蘭陵僧孺

飄素

瑩檐溜嚴結噎通歧樽壘如未斡况乃限音儀

謝洗馬吳

原隰望徙倚松筠竟不移隱憂慙萱樹忘

懷待山巵

謝郎中緩

初昕逸翮舉日具駑馬疲幽山

有桂樹歲暮方參差

沈右率約

還塗臨渚

淶水纈清波青山繡芳質落景皎晚陰殘花綺

餘日

何從事

白沙澹無際青山眇如一傷此物運

移惆悵望還律

吳郎

白水田外明孤頂松上出即

趣佳可淹淹留非下秩

府君遥和

紀功曹中園

蘭庭迎遠風芳林接雲萼傾葉順清颯脩莖佇

高鶴

何從事

連綿夕雲歸掩曖日將落寸陰不可

謝集五

十

留蘭墀豈停酌

吳郎

丹櫻猶照樹綠筠方解籜求

志能兩忘即賞謝丘壑

府君

閑坐

雨洗花葉鮮泉漫芳塘溢藉此閑賦詩聊用蕩

羈疾

陳郎

霖霖微雨散萎蕤蕙草密預藉芳筵賞

沾生信昭悉

功曹紀晏

紫葵窻外舒青荷池上出既

闔潁川扇且卧淮南秩

府君

流風薄晚陰行雲掩

朝日念此蘭蕙客徒有芳菲質

何從事

侍筵西堂落日望鄉

沉病已綿緒

一作綿

負官別鄉憂高城悽夕吹時

見國煙浮

曹丞

漠漠輕雲晚颯颯高樹秋鄉山不

可望蘭巖且獻酬

君府

旻高識氣迥泉停知潦收

幸預慶延渥方且

一作將

沐恩猷

功曹紀晏

芸黃先露

早騷瑟

一作屑

驚暮秋舊城望已肅况乃客悠悠

何從事

祀敬亭山春雨

水府衆靈出石室寶圖開白雲帝鄉下行雨巫

山來

君府

歌風讚靈德舞蹈起輕埃高軒乍留吹

玄羽或徘徊

何從事

福降群仙下識逸百神該青

鳥飛層隙赤鯉泳瀾隈

齊舉郎

謝集五

十一

往敬亭路中

山中芳杜綠江南蓮葉紫芳年不共遊淹留空

若是

君府

淥水豐連漪青山多繡綺新條日向抽

落花紛已委

何從事

弱葭既青翠輕莎方霍靡鷺

鴉沒而遊麇麇騰復倚

齊舉郎

春岸望沉沉清流

見瀾瀾幸藉人外遊盤桓未能徙

陳郎

鶩柁把瓊

芳隨山訪靈詭榮楯每嶙峋林堂多碣礪

君府



謝宣城詩集卷第五



南齊吏部郎謝朓長五言詩其在宣城所賦藻績尤精故李太白詠澄江之句而思其人杜少陵亦曰詩接謝宣城也余至郡視事之暇裒取郡舍石刻并宣城集所載謝詩纔得二十餘首繼得蔣公之竒所集小謝詩以昭亭廟壘嶂樓綺霞閣所刻及文選玉臺新詠本集所有合成一編共五十八篇自謂備矣然

謝集跋

一

小謝自有全集十卷但世所罕傳如宋海陵王墓誌集中有之而筆談乃曰此銘集中不載蓋雖存中之博亦未之見也而余家舊藏偶有之考其上五卷賦與樂章之外詩乃百有二首而唱和聯句他人所附見者不與焉以是知蔣公所謂本集者非全集矣於是屬之僚士叅校謬誤雖是正已多而有無他本可

證者故猶有闕文鋟版傳之目曰謝宣城詩集其下五卷則皆當時應用之文衰世之事其可采者已載於本傳文選餘視詩劣焉無傳可也遂置之紹興丁丑秋七月朔東陽樓炤題

謝公詩名重天下在宣城所賦爲多故杜少陵以謝宣城稱之在宣城宜有公之集矣後公六百五十餘年樞密樓公始克鋟之木距今又六十四年字畫漫毀幾不可讀是用再刻于郡齋以永其傳嘉定庚辰冬十二月

望鄱陽洪汲識

識

洪汲

洪汲

洪汲